



Sagarra jotzen, Sagardoetxea museoko gune batean, sagastian. SAGARDOETXEA

SAGARDOETXEA, MUSEO BIZIA

Astigarragako Sagardoetxea museoak sagardoa, ohiturak, historia eta natura uztartzen ditu. Urte osoan antolatzen ditu jarduerak eta ekitaldiak.

Sagardoetxea euskal sagardoaren museoa da. Hiru gune ditu, kanpoan daukan sagastia, museo barruko gunea eta dastaketa gunea, eta urte osoan egin daitezke bisita gidatuak, urtaro bakoitzerako jardueri lotuta. Bisita gidatu bat egiteko erreserba lehenago egitea komeni da. www.sagardoetxea.com helbidean lor daitezke bisita gidatu bat antolatze-ko argibideak, eta baita Sagardoetxearen inguruko informazio gehiago ere.

Denda ere badauka, eta sagardoa eta sagarraren bidez egindako zenbait

produktu eskura daitezke. Horiei guztiei buruzko informazioa ere ematen dute Sagardoetxean.

Haren helburua da sagardoaren, sagardotegien eta txotx egiteko ohituraren inguruko guztia azaltzea, eta sagardoaren sustapen soziokultural eta turistikoa egitea. Hala ere, sagardoaren kultura hedatzeko ez ezik, artxibo bat eratze eta ikerketa egiteko ahaleginak egiten ditu.

2006. urtean ateak ireki zituenetik, urtero-urtero gero eta bisitari gehiago izaten ditu museoak. Urte osoan, gu-

txi gorabehera, 12.000 bisitari izaten dira.

Museo bizia da, eta urte osoan antolatzen ditu jarduerak eta ekitaldiak. Esaterako, urtarrilaren 11rako Sagardo Berriaren 24. Eguna antolatu dute Sagardoetxean, 2017ko txotx garaiaren hasiera dela eta.

Abenduaren 17an, Sagardoetxeak Astigarragako Herri Eskolak antolatutako San Tomas jaialdian parte hartu zuen, eta pinu bat sagarrekin eta kandlekin apaintzeko aukera eskaini zien familiei Astigarragako Foru Plazan.

Antzina egiten zen usadioa da hori, eta abenduko zubian, abenduren 3tik 11ra, Sagardoetxean bertan egin zuten, eta museora etorritako bisitariak apaindu zuten beste pinu bat.

Abenduaren 5ean Astigarragako Herri Eskolako haurren bisita izan zen, eta Santiagomendiko Inaxi amona zahararren eskutik pinua modu horretan apaintzearen arrazoia ezagutu eta beren desioak pinutik zintzilikatu zituzten. Astigarragako herritarrek ere pinua apaindu eta argiak pizteko aukera izan zuten egun horretan. Abenduko

Sagardoetxeako bisita gidatuak urtaro bakoitzerako jardueri lotuta daude


zubian beste hainbat jarduera izan ziren. Besteak beste, Barriko-tea gaztainekin dastatze berezia. Antzina, sagardotegiko lanak

bukatu ondoren, barrika muztioarekin betetzen zuten sagardogileek, eta, bi aste geroago, festa egiten zuten bizilagunekin.

Plan ederrak

Sagardoetxeak plan ederrak antolatzen ditu. Besteak beste, Sagardoetxea eta sagardotegia, museoa ezagutzeko eta sagardotegi menu batez gozatzeko; Sagar muztioaren elaborazioa, sagarrak kizkiarekin biltzeko eta ondoren jotzeko eta prentsatzeko, eta egindako muztioa dastatzeko; Sagardoa eta gazta, sagardoa eta Idiazabalgo gazta batzen dituen eta gaztandegi bat bisitatzeko aukera eskaintzen duena; eta Sagardoa eta itsasoa, Aquariuma eta Albaola Itsas Kultur Faktoria bisitatzeko eta itsasontzi batean txango bat egiteko.

Halaber, beste hainbat jarduera antolatzen ditu urte osoan, familientzat, ikastetxeentzat, euskaltegientzat eta aisialdi taldeentzat. Sagardogile egun batez! egitasmoaren bidez bisita gidatua egiteko ez ezik sagar muztioa egiteko aukera ematen die familiei. Txotx! euskaraz jarduera euskaltegietako ikasleentzat antolatzen dute, eta sagardogintzako euskarazko hiztegia lantzeko bisita berezia da. Azkenik, Udajolas egitasmoa aisialdi taldeentzat antolatzen du, haurrek eta gaztetxoek bisita gidatua eta sagardoaren kulturaren inguruko joko eta tailer bereziak egin ditzaten.



Sagardoetxea museorekin ataria, barrualdea, eta hainbat lagun txotx egiten bisita gidatu batean. SAGARDOETXEA